



舍利弗問須菩提：「何因緣故，色不生，是非色。受、想、行、識不生，是非識。乃至一切種智不生，是非一切種智？」

須菩提言：「色、色相空，色空中無色、無生，以是因緣故，色不生，是非色；受、想、行、識、識相空，識空中無識、無生。以是因緣故，受、想、行、識不生，是非受、想、行、識。檀波羅蜜、檀波羅蜜相空，檀波羅蜜中無檀波羅蜜無生。……：般若波羅蜜、般若波羅蜜相空，般若波羅蜜空中，無般若波羅蜜無生。以是因緣故，般若波羅蜜不生，是非般若波羅蜜。內空乃至無法有法空，四念處乃至十八不共法，一切種智，亦如是。以是因緣故，內空不生是非內空，乃至一切種智不生是非一切種智。」

舍利弗問須菩提：「何因緣故，言色不二是非色？受、想、行、識不二是非識？乃至一切種智不二是非一切種智？」

須菩提答言：「所有色、所有不二，所有受、想、行、識，所有不二，是一切法皆不會、不散，無色、無形、無對，一相，所謂無相。眼乃至一切種智，亦如是。以是因緣故，色不二是非色，受、想、行、識不二是非識，乃至一切種智不二是非一切種智。」

舍利弗問：「何因緣故，言是色入無二法數？受、想、行、識入無二法數？乃至一切種智入無二法數？」

須菩提答言：「色不異無生，無生不異色，色即是無生，無生即是色；受、想、行、識不異無生，無生不異識，識即是無生，無生即是識。以是因緣故，色入無二法數，受、想、行、識入無二法數；乃至一切種智亦如是。」

色是空，色中無色相。行者以是無生智慧，令色無生。若能得是無生，心作是念：今即得色實相，是故說色無生為非色。色性常自無生，非今智慧力故使無生。如有人破色令空，猶存本色想。譬如除廁作舍，今雖無廁，猶有不淨想，若能知廁本無，幻

化所作，則無廁想。行者如是，若能知色從本已來初自無生者，則不復存色想。是故言色無生為非色。乃至一切種智亦如是。

無生即是無二，是生若初生，若後生，破如是等生，名無生。今破眼色、有無等諸二故，是名不二。行者或先入無生觀門，後入不二；或先入不二，後入無生觀。義雖一，行者分別。破色二故言不二，破色生故言無生。上說無生因緣，謂自相空；今說不二因緣，所謂不合、不散，一相、所謂無相等。義雖同一空，上自相空，此是散空。

色入無二法數者，行者觀色不生不滅相，是時分別色，今變為無生，是故說色無生即是不二。何以故？色破散即是無生。如先分別諸法時，離色不得更有生，今色破散即是無生，不得更有無生。以是故，色即是入無二法數。

爾時須菩提白佛言：「若菩薩摩訶薩行般若波羅蜜，如是觀諸法，是時見色無生，畢竟清淨故。見受、想、行、識無生，畢竟清淨故……見佛、佛法無生，畢竟清淨故。」

舍利弗語須菩提：「色是不生，受、想、行、識是不生，乃至佛、佛法是不生。若爾者，今不應得須陀洹、須陀洹果，……：辟支佛、辟支佛道；不應得菩薩摩訶薩一切種智；亦無六道別異，亦不得菩薩摩訶薩五種菩提。若一切法不生相，何以故須陀洹為斷三結故修道？斯陀含為薄淫恚癡故修道？阿那含為斷五下分結故修道？阿羅漢為斷五上分結故修道？辟支佛為辟支佛法故修道？何以故菩薩摩訶薩作難行，為眾生受種種苦？何以故佛得阿耨多羅三藐三菩提？何以故佛轉法輪？」

須菩提語舍利弗：「我不欲令無生法有所得，我亦不欲令無生法中得須陀洹、須陀洹果，乃至不欲令無生法中得……：辟支佛道。我亦不欲令無生法中菩薩作難行，為眾生受種種苦。菩薩亦不以難心行道，何以故？生難心、苦心，不能利益無量阿僧祇眾生。今菩薩憐愍眾生，令眾生如父母兄弟，如兒子及己身想，如是能利益無量阿僧祇眾生；是用無所得故。所以者何？菩薩摩訶

薩應生如是心：如我一切處、一切種、不可得，內外法亦如是。若生如是想，則無難心、苦心。何以故？是菩薩於一切種、一切處，一切法不受故。我不欲令無生法中得阿耨多羅三藐三菩提，亦不欲令無生（法）中轉法輪，亦不欲令無生法得道。」

無生觀有二種：一者、柔順忍觀；二者、無生忍觀。前說無生是柔順忍觀，不畢竟淨；漸習柔順觀，得無生忍，則畢竟淨。菩薩得無生忍時，滅諸煩惱，得菩薩道，入菩薩位，雖有煩惱氣，坐道場時乃盡，無所妨故畢竟淨。

畢竟清淨者，於柔順道畢竟清淨，非為佛道。以象生空、法空故，從見色無生畢竟淨，乃至佛及佛法畢竟清淨。

五種菩提者：一者、柔順忍；二者、無生忍及三種菩提，於三種菩提中，過二而住第三菩提。復有五種菩提：一者、名發心菩提，於無量生死中發心，為阿耨多羅三藐三菩提故，名為菩提，此因中說果。二者、名伏心菩提，折諸煩惱，降伏其心，行諸波羅蜜。三者、名明心菩提，觀三世諸法本末總相、別相，分別籌量，得諸法實相，畢竟清淨，所謂般若波羅蜜相。四者、名出到菩提，於般若波羅蜜中得方便力故，亦不著般若波羅蜜。滅一切煩惱，見一切十方諸佛，得無生法忍，出三界，到薩婆若。五者、名無上菩提，坐道場，斷煩惱習，得阿耨多羅三藐三菩提。如是等名五菩提。

菩薩若有難心、苦心，則不能度一切象生，菩薩具大慈大悲心，於象生如父母、兒子、己身想。何以故？父母、兒子、己身，自然生愛，非推而生愛也。菩薩善修大悲心故，於一切象生乃至怨讎，同意愛念。是大悲果報利益之具，都無所惜，持內外所有，盡與象生。此中說不惜因緣，所謂一切處、一切種、一切法不可得故。若行者初入佛法，用象生空，知諸法無我；今用法空，知諸法亦空。以此大悲心及諸法空二因緣故，能不惜內外所有，利益象生，不起難行想、苦行想，一心精進歡喜。

一切諸法畢竟空，不可思議相故，一切法還而不轉故，不名

為轉，但為破虛妄顛倒故，名為轉法輪。

須菩言：「有知有得，不以二法（生法、無生法）。今以世間名字故，有知有得，……第一義中，無知無得，無須陀洹，乃至無諸佛。……六道別異，亦世間名字故有，非以第一義。何以故？第一義中無業無報，無生無滅，無垢無淨。……色是不生法，自性空，不欲令生；受、想、行、識不生法，自性空，不欲令生；乃至阿耨多羅三藐三菩提不生法，自性空，不欲令生。……生、不生，是二法不合、不散，無色、無形、無對，一相，所謂無相。以是因緣故，非生，亦非不生。……我樂說無生法，亦樂說無生相，何以故？諸無生法及無生相，樂說及語言，是一切法，皆不合、不散，無色、無形、無對，一相、所謂無相。……色不生，受、想、行、識不生；眼不生，乃至意不生；地種不生，乃至識種不生；身行不生，口行不生，意行不生；檀波羅蜜不生，乃至一切種智不生。以是因緣故，我樂說無生法，亦樂說無生相，是樂說語言亦不生。」

一切法無生相，無生相不可證。若用生法證，生法虛誑，已種種因緣破，又不可以生法得脫生法。若以無生法證，無生未有法相，不可以證。云何得證？故二法皆不受，俱有過故。

第一義中無象生故，無須陀洹乃至佛；法空故，無須陀洹果，乃至佛道。聖人、聖人法猶當虛誑無定實，何況凡人六道業及果報？用慧眼觀一切法皆不生，若生，生法已生，不應更生；若不生，生法未有故，不應生。若謂生時半生半不生，是亦不生，若生分則已生竟，若未生分則無生故。故二法皆不受，但說是生如幻如夢，從虛誑法生，應離、應不取相。

色乃至一切種智畢竟不生，自然空相，不欲令實中有生；若世諦虛誑可有生，生如幻化。此中說不生因緣，所謂不合、不散。而又無法可合，無法可散。無色、無形、無空，一相、所謂無相。空相尚不受，何況餘相！須菩提樂說無生法及語言皆無生，是實清淨。